

(四縣腔) 編號 01 號

【蝠婆】許倩雯原作

歸百隻蝠婆，像燥絲絲个鹹菜乾，一皮一皮仔倒吊在窿肚个壁頂。日頭落山，天色暗下來。頭那生到像老鼠樣仔个蝠婆睡醒哩！翼披披仔，陣打陣對窿肚飛出來絡食。暗青色个天頂，就像分人掖咧麻仔，一下仔就密麻濟借。

蝠婆實在慶！在暗晡頭飛到恁遽，也毋識看佢撞著麼个東西，連細細條个電線乜閃得過。你定著恍著蝠婆个目珠當利係無？其實毋係，蝠婆係用「聲」來定位个。佢兜會發出人个耳公聽毋著个高頻聲，這聲像海浪樣仔打出去，堵著東西就會彈轉來。蝠婆就用應聲，算準東西个距離同大細也用應聲，尋著食物。

一直恍著蝠婆歇在山窿抑係石窟肚。該日，兩兄弟在棚頂高¹搞，手癢，拿等球仔就開始相擲。無想著無擲準，嘎將天篷个枋仔擲爛一空。兩兄弟臥頭看等該隻空仔，毋知愛仰結煞正好！忽然間，三隻烏疏疏个東西，對空仔肚鑽出來，翼啪啪滾个在間房飛來飛去。這聲實在得人驚！嚇到細老弟啞啞喊：「喺……

喺……喺血鬼來也！」佢遽遽用手護等頸根，驚到鑽入眠床下毋敢出來。膽大个阿哥緊拚拚仔擎起掃把開始亂拂²，想愛同蝠婆打下來！

阿婆聽著聲，行上樓頂，大聲講：「拜託地哪！掃把同佢放下來！莫恁衰過，蝠婆會分你打死！」續等又講：「正經電視看忒多哩，毋讀書。臺灣个蝠婆哪會喺人个血，蝠婆飛入屋下係當好个占頭！」

阿婆打開窗門分蝠婆飛出去，再過帶等孫仔去看厝間房該頂紅眠床，眠床个架仔頂正經刻有蝠婆个圖像。阿婆又喊老弟撈頸根戴个玉仔撈出來分大家看，也刻有蝠婆个型仔。眠床个架仔頂，刻咧五隻蝠婆，安到「五福臨門」玉仔刻咧一粒桃仔同蝠婆，表示「福壽延年」。原來西方人看蝠婆係鬼怪个化身，毋過事事追求吉祥个偲兜看蝠婆係福氣个象徵。

日頭出現在東片析个山頭，臨天光哩！三隻飛出去个蝠婆，

又對屋簷鑽入，福氣臨轉家門也！

¹ 棚頂高：音 pang ∨ dang ㄋ go ㄘ；樓上。

² 拂：音 fin ；搖動、甩動。

【吾个飯筍仔】鄒瑞梅原作

對出世到這下，阿婆一等惜偃，驚偃熱、驚偃寒、驚偃三餐無正常。

同學个飯筍仔大部分係做阿姆準備个，吾个飯筍仔係阿婆親手做个。逐日當晝食飯个時節，就像開獎共樣，吾飯筍仔特別香，裡背有魚有肉有青菜，還有阿婆惜花連盆，惜子連孫，惜偃惜入心个親情。坐在吾邊脣个阿明牯、阿秀撈阿華目盯盯仔緊看吾个飯筍仔，口涎水強強就會流出來哩！偃詐意講飯筍仔打毋開，佢兜比偃還較緊張，儕儕相爭愛撈偃搵手，實在還生趣！等偃打開飯筍仔，歸間教室都鼻得著阿婆个好手藝，阿明牯揣講一定係炆爌肉，正經分佢揣著哩！偃兜感情當好，還會交換菜食，佢食吾个爌肉，偃食厥个煙腸，食到飽飽仔。

阿婆个好手藝，仰般講都毋會漏氣¹佢煎个黃魚兩片赤赤毋會臭火爌。偃最好食阿婆燂个炒肉，堵著敬神拜祖个時節，阿婆會準備雞鴨、魷魚仔、豬肉料、豆腐乾湊牲敬祖。該暗晡个桌頂，定著會有鹹香鹹香个炒肉，阿婆會特別吩咐阿姆愛加煮兩碗米哦！

¹ 漏氣：音 lau kui；閩南語借詞。比喻行為表現令人失望。

阿婆同阿姆在灶下無閒泊杈，阿姆撈魷魚仔、豬肉料、豆腐乾，還有自家菜園摘个蔥仔、蒜仔、芹菜、辣椒仔，通棚切好勢就準備換阿婆炒菜哩！阿婆兩下手就炒出客家好味緒。桌頂有雞盤、快菜炒豬旺仔、薤菜、鹹菜湯，還有偃最好食个炒肉。阿公、阿爸、阿姆緊食緊阿腦阿婆个手路菜，好食到舌嬾就會吞落去，炒肉實在當扯飯哦！偃撈阿哥連食兩碗飯，食到飯甌都見底哩，桌頂个菜分偃兜掃淨淨，偃撈阿哥食到肚圓圓仔，阿婆看著嘎好笑。

食飯个時節，阿婆將偃撈阿哥个飯筍仔裝到淦淦，阿婆自家个碗肚淨有菜味攪飯²。

食等阿婆親手做个飯筍仔，就想著阿婆在灶下汗流脈落个身影。偃愛煞猛讀書，做一個有用个人，等偃大咁，一定愛報答阿婆个恩情。阿婆畜偃大，偃定著會有孝阿婆到老。

² 攪飯：音 giau / fan；拌飯。